


Vischnaunca da Medel/Lucmagn



**Lescha da sepultura e da santeri
per la
vischnaunca da Medel/Lucmagn**

I. Determinaziuns generalas

Art. 1 Basa legala

¹ Sebasond sin la lescha da sanadad dil cantun Grischun relai la vischnaunca da Medel/Lucmagn questa lescha da santeri.

² Aschilunsch che questa lescha prescriba nuot auter, valan las determinaziuns dallas ordinaziuns federalas e cantunalas.

Art. 2 Intent

Questa lescha regla ils fatgs da sepultura ed il diever dil santeri.

Art. 3 Survigilanza ed incumbensas

¹ Il satrar ed il santeri ei caussa dalla vischnaunca. Ella procura ch'il santeri vegn tenius da tuts en duida honur.

² La suprastonza communal survigilescha l'execuziun ed interpretaziun da questa lescha e decida tuttas damondas che pertuccan igl uorden santeri.

II. Uorden da sepultura

Art . 4 Dretg da schar satrar

Il dretg da schar satrar en santeri communal han:

- a) tuts domiciliai en vischnaunca;
- b) burgheis da Medel che habiteschan ordeifer;
- c) tut quels ch'ei morts sin territori dalla vischnaunca;
- d) cun lubientscha speciala dalla suprastonza communal: persunas che han il giavisch da vegnir satrai en la vischnaunca.

Art. 5 Preparativas da sepultura

L'administraziun communal ordinescha la preparaziun dalla fossa e pren en cass specials sco per exempel en cass da baras anfladas senza survivents tut las ordinaziuns per la sepultura.

Art. 6 Temps da satrar

Las sepulturas e las cremaziuns astgan succeder sil pli baul 48 uras e dueien per regla haver liug sil pli tard 72 uras suenter la spartida dil defunct. Cass specials basegnan ina lubientscha excepziunala dil medi districtual.

Art. 7 Caplutta da morts

La vischnaunca metta a disposiziun il carner (caplutta da morts) ella baselgia s. Martin a Platta, nua ch'ins sa collocar ils defuncts en vischi ni en urna.

Art. 8 Prestaziuns dalla vischnaunca

Tier las sepulturas organisescha la vischnaunca:

- a) la publicaziun officiala;
- b) il cavar e cuvierer la fossa;
- c) la rama ed il crap dalla fossa en crap artificial;
- d) il tschentar la rama provisoriala da lenn;
- e) il tschentar la rama ed il crap dalla fossa;
- f) arver e serrar las nischas d'urna;
- g) l'inscripziun sin la fossa comunabla.

Art. 9 Taxas

Per cuvierer las spensas incassescha la vischnaunca ina taxa. La suprastanza communal relai in'ordinaziun da taxas.

III. Uorden santeri

Art. 10 Register da fossas

La vischnaunca meina in register dallas fossas che cuntegn la numera dalla fossa, il num, il prenum, igl onn da naschienscha e mort da tut ils satrai.

Art. 11 Partiziun dil santeri

¹ Il santeri ei dividius en secturs. Ei vegn satrau en retscha conform al plan dil santeri. Quei vala era per urnas.

² Sin giavisch dil defunct ni dils parents sa vegnir satrau urnas en ina fossa occupada ni sutterrau pliras urnas en la medema fossa. Gl'oriund ruaus da fossa vegn buca prolungius cheutras.

³ Ella fossa communabla per urnas sa vegnir satrau mo la tschendra dil defunct.

Art. 12 Ruaus da fossa

¹ Il ruaus da fossa munta silmeins 20 onns per sutterradas e per fossas d'urna.

² Cruschs e monuments dallas fossas cavadas si ston vegnir allontanadas ord santeri enteifer in meins suenter la visada officiala.

³ Vegn ei buca dau suatientscha a quella ordinaziun lai la vischnaunca allontanar ei cun adossar ils cuosts als parents.

Art. 13 Exhumaziun

¹ L'exhumaziun d'ina bara avon la spiraziun dil ruaus da fossa ei scumandada.

² Per excepziuns ei la suprastonza communal cumpetenta.

Art. 14 Profunditad dalla fossa

La profunditad minimala dalla fossa munta:

- 1.50 m tier fossas per vischals;
- 0.80 m per fossas d'urnas.

Art. 15 Qualitad dils vischals

Per sutterradas eis ei da duvrar vischals da lenn lom. Ei la bara aunc enzugliada en ina folia da metal ni da plastic, eis ei da procurar cuort avon la sutterrada a moda cunvegnenta ch'aria sufficienta hagi access alla bara.

Art. 16 Cruschs-fossa e monuments

¹ Ei sto vegnir tschentau ina crusch sin fossa.

² Cruschs-fossa ston esser da fier zincau e patinau. Cruschs da lenn e ghisa ein buca lubidas.

Art. 17 Mesiras

¹ Cruschs-fossa astgan haver la dimensiun da 1.00 m – 1.30 m altezia inclusiv postament.

² Igl ei buca lubiu da postar plattas ni glera sin la fossa che cuvieran l'entira fossa. Minimum $\frac{1}{3}$ dalla fossa sto vegnir munida cun flurs.

Art. 18 Inscriziun

¹ L'inscripziun sin la crusch fossa sto cuntener num, prenum, onn da naschientscha ed onn da mort dil defunct.

² Il procurar per l'inscripziun sin la tabla da nischas d'urna ei caussa dils parents.

³ Tuttas inscripziuns han da succeder per romontsch.

Art. 19 Manteniment dallas fossas

¹ Ils parents dils defuncts ein obligai da mantener las fossas en digna fuorma e pietad.

² Vegn quei tralascchau sa la suprastonza communal prender las mesiras necessarias.

³ Igl ei scumandau da plantar plontas e caglias sin las fossas, aschilunsch che quei ha consequenzas surproporzionadas sil contuorn.

⁴ Il manteniment dalla fossa comunabla ei caussa da vischnaunca. Ei sa vegnir embelliu la fossa durant il temps da cordoli tochen in meins suenter la sepultura el liug previu.

⁵ Sin giavisch sa il manteniment da fossas vegnir surdaus alla vischnaunca encunter in'indemnisaziun fixada el regulativ da taxas.

IV. Determinaziuns finalas

Art. 20 Sancziuns

¹ Surpassaments da questa lescha san vegnir puni dalla suprastonza communal cun multas da fr. 100.— entochen fr. 1'000.—.

² Vegnan cruschs encunter las prescripziuns dalla lescha eregidas, ordinescha la suprastonza communal da midar ni spazzar ils indrezs.

Art. 21 Dretg da recuorer

Encunter decisiuns e disposiziuns dalla suprastonza communal san ins recuorer enteifer 20 dis alla Dertgira administrativa dil cantun Grischun.

Art. 22 Approbaziun e vigur

¹ Questa lescha remplazza la lescha da sepultura e santeri dils 9 da november 2000.

² Questa lescha ei vegnida approbada dalla radunonza communal dils 7 da december 2023 e passa immediat en vigur.

Il president communal:

Il canzlist communal:

Claudio Simonet

Valentin Pally